

(Ref.: T. Turi 31).

Tera te whetu, taukapo ana mai
I te hori ki waho ra;
I haramai ra koe i a Te Atuawera.¹
Koua wehea atu.
Whakahoutia mai i te po tonu nei,
Ka oho au ki te ao, i.

Mei whaia ana e au akuanei,
Kore rawa i anga mai.
Ka riro to hu i a Wete² ra ia,
Ka mau atu te para.
No muri nei ia koe
Ka eke waiehu mai,
Ka rato kei te marea i,

Kaore te po nei tuarua rawa mai
Naku rawa i whakaehu;
Naku rawa i kakekake
Te tapu Irakewa³
I Opihi⁴ ra ia, i.

¹Te Atuawera:—Kei te ngaro tenei.

²Wete:—Kei te ngaro tenei.

³Irakewa:—Ko te papa o Toroa, o tera waka o Matatua. E ki ana a Tuhoe nana te mate i mau mai i Hawaiki. E kiia ana kua tae mai ia ki tenei motu i mua atu i te taenga mai o Matatua. I hoki ia ki Hawaiki, a nana i tohutohu te ara mai o Matatua. I mua atu i a ia kaore ano te mate i kitea ki tenei motu. Kei runga o Maungapohatu tetahi toka e kiia ana ko te Tapapatanga o Irakewa. (Tr. 37/7 & 127).

⁴Opihi:—He toma kei rawahi atu o te *tuone* i Whakatane.

161.—HE WAIATA,

Na Pare-hokotoru.

(Te Arawa).

Na Te Taite Te Tomo i whakamarama.

Ko Pare-hokotoru no Te Arawa. Ko ia ano tera e whaka-huatia ra i te patere a Erenora, i te waiata nama 142.

(Ref.: M.101).

‘Ore te koera!’ Kei te ngahae
Me ko au ka maka.
E ai nei hoki
I te toka rurenga tai,
O waipohewa² au
E neneke i te ngaru
Nga heke tai ra;
He kai whakahoha,
He riri te kore.